

TIMOTEYON ISTE 2

Tauamboen Timoteyo chiaid

¹ Pabado nebi. Nuquin Papan tantiacpadomboen Esuquidistun: —Ĕbi chuibeneta —caidquio nebi. —Ambi chiampicpadomboen aton Mado Esuquidistu tantiaquid unēsacsho Nuquin Papan abēdi tabadmendac —quequin Esus chuibenequidquio nebi. ² Con mado icbobimboecquid mibi neque. Mibi chuiquin nēid dada uanu, Timoteyo. —Nuquin Papan aton Mado Nuquin Icbo Esuquidistubēdtan bēdamboen isquin bēdambo icmepashun —quequin mibi tantiembi.

Chieshtoenquio icquin Esus chuiban, quiaid

³ Con tsusedpabon nacpadomboen Nuquin Papauidi tantiaquin ambi chiacpadomboen natiadquio iquebi. Adquid icquin Nuquin Papa mibi chianembi. —Mibi tantiaquid Timoteyo bēdambo iquec, Papa. Adquio icmec mibi bēdamboshē iquec. Adquiouidi icmeta, Papa —quequin Nuquin Papa chianembi. ⁴ —Ĕbi nidnu —quesho tantias mibi shubiondaid tantiec mibi iste bunquiebi, mado. Ambo nidash mibi isec cuishonquetsiabi. ⁵ Naden mibi tantiembi. —Aton chichi Doida caidēn ani Eunisebēdtan aid daēdshumba Esus tantiaabenquiacpadomboen Timoteyonsen nēbi Esus tantiaquiec —quequin mibi tantiembi. ⁶ Adquid icsho mimbi tantiondaid padpiden mibi chuinu. —Min Mayan nēidbēd tabadmequin cuesambo icmequin Esus chuibame, Papa —quequin mibi mamishquin Nuquin Papa chiondambi. Adoac aton Mayan mibēd tabadmiac. Adoaid icquin dacuēdenquio icquin Esus chuibanta, mado. ⁷ ¿Nuquin Papan aton

Mayan nuquibëd icmiacta nuqui natia dacuëdpe? Padenquo. Comapenen tantiaquid yec nuquibëd icquin nuqui cuesambo icmec. Adembidi Nuquin Papan Mayanën tantiamiac nuqui matses bëdamboen tantiec. Adembidi nuqui icsate bunaid namenquo icquin mëmunquidquo icnuc nuqui bëdambo icmec.

⁸ —Adoaid nebi —queshun dacuëdenquo icquin Nuquin Icho Esus chuibanta. Adembidi dacuëdenquo icquin: —Pabado tantiaquiemi —cata. —Quënën nauedtsaid Pabado tantiatapi —quenda. Utsibon cuestiadquo icquin chieshënaqui Nuquin Papan namiacpadech chieshtoenquo icquin Esus chuibanuna.

⁹ Nuquin Papan: —Bëdamboec tabadquid icmequin con Mado Esus tantiamemi —caido icquin adonona. ¿Nuqui bëdamboecuidi tabadshoda Nuquin Papan nuqui bëdamboen isbempondash? Padenquo.

Ëndenquimboshë nidaidbëdta matses uabi Nuquin Papan: —Ëmbi chiaid niac-niaquec icsambo icboedëmbi con Mado Esus tantiasho cuidenquo iquendambi —quequin ambi chuipampicpadomboen nuqui Esus tantiamiac.

¹⁰ Aden ambi chuipampid tantiamiabi icshumbic nëbi Esuquidistu matsesmeshun matses tantiamiac. Adoac: —Abi tantiaquid unësacsho icsaido cuidacno nidmenquo icquin unëstiapimbo icquid icmequin Nuquin Papa yacno abëdi Esuquidistun tabadmendac —quequin nuqui tantiec.

¹¹ Aden tantiaquin Esus chuibenequidquo nebi. —Ëbi chuibeneta —Esusën caondaaid yec Nuquin Papabëdta Esus tantiamequidquo nebi.

¹² Aden chuibeneshobini chieshënquin quënën nauedondash. Adoqui chieshtotiapimbo icquin Esus tantiembi. —Ëmbi tantiaidquo comapenen tantiaquin nabanquidquo Esus nec. Adquid icquin: “Ëbi tantienquo yanushe,” qeshun abi tantiamequin ëbi chieshtomenquo iquendac.

Nidaidën choabi icquin Esusën ëbi chieshtoenquo icquid icmendac —quec dacuëdenquo iquebi. ¹³ Tanta, mado. Mibi chuinu. Ëmbi abimbo chiondaidquo chuiban: —Nuquin Papan chiaidquo nec —queshun. Esuquidistu tantiaquinc matses tantiaquinc caquin adenuidi chuibanta, mado. ¹⁴ Nuquin Papan Mayan nuquibëd iqueque. Aidën namiac ëmbi chiondacadomboen Nuquin Papan chiaidquo chuiquin Esus chuibanta, mado.

Onesipodo chiaid

¹⁵ Ëmbi: —Cho —cac choenquo icboed mimbi tantiac, mado. Nidaid utsi Asia caid yacnocquido dadpen adec choenquo iccosh. Edemoquenes caid choenquo iccosh. Adecbidi Piquedo caid chedo. ¹⁶ Onesipodo caidën nëbi bëdamboen isposhi. Ëbi quënën nauedacsho dacuëdenquo icquin isuan-isuanquin bëdambo icmioshi. Adsho isun: —Aton shubun icquidobëdta aid bëdamboen ista, Papa —quequin Nuquin Papa chianembi. ¹⁷ Aidëmbi nëmbo shubu dadpen icquid Doma caid yacno choboshon: —¿Mitsimbo Pabado icpec? —quequin yuen nibëmbenquin istuidpondashi. ¹⁸ Mimbi isnubi Epeso yacnoshon aidëmbidi baded-badedquien nashundeniondashi. Adsho tantiashun: —Nidaidën padpidec choshon Nuquin Icbon Onesipodo bëdamboen isplashun —caimbi.

2

Chieshtoenquo icquin chuiban, quiaid

¹ Chieshtoenquo icquin Esus chuibanta, mado. —Esuquidistun ëbi bëdamboen isec. Aidën bëdambo icmiac dayacquio icquin naimbi —queshun chieshtoenquo icquin Esus chuibanta. ² Matses dadpenshun tantianuc ëmbi chuibansho mimbi tantiondac. Ëmbi aden chiondaid utsibotsen chuiban. Adshun mimbi chuiboedo

abentse-abentsen chuita. —Nëidën chieshtoenquo icquin Esus chuibantsiash —queshun: —Mimbitsen chuiban —cata, mado. ³ Sondado bédambo icquidën nacbimboen chieshtoenquo icquin bédamboen nabanuna. Matsesën chieshënubi Esuquidistun chiacpadomboenuidi nanuna chieshtoenquo icquin. ⁴ Sondadon: —Mibi bédambo iquec —camenuen aton chuiquid dapan chiacpadomboenuidi naquid. Ambi tantiaid nainquo icquinc utsibon chiacpadomboen nainquo icquinc caquin aton chuiquid dapan chiacpadomboenuidi naquidquo sondado nec. Adomboembidi Nuquin Icbon chiacpadomboenuidi nanuna, mado. ⁵ Ma nuquin matses titinquequidquo. ¿Mitsipadquo icpec? Aton uidën tanec aton matsesën chiaction abia titinquec chosho: —Bédamboec titinquiosh —queshun mauete menequid. Ambi chiaction titinquiabi icsho mauete menenquo icquid. Adembidi: —Mimbi bédamboen naoc —Nuquin Icbo camenuen ambi chiacpadomboen chieshtoenquo icquin nabanuna, mado. ⁶ Ma nuquin matses tied uaquidquo. ¿Mitsipadquo icpec? Choadquidënquo dayacquio icquin aton tied uashun ambi nitsinaid pequid. Adembidi Esus chuibanquid icquin dayacquio icquin Esus chuiban-chuibanuna ënenquo icquin. Adoac utsibon Esus tantiabentsiash. ⁷ Aden ëmbi chuiboed tantiata. Adsho Nuquin Icbon mibi bédamboen tantiametsiash.

Esuquidistu tantiata, quiaid

⁸ Utsibon chieshënubi Esus tantiata, mado. Aidi matsesash isadaidbo tsusedpa Dabidën tsyuecquid nepanëdash. Nuquin Papan uincuemenëdaidquo yec abi iquec. Aidquo tantiaquiota. Aid chuibenequidquo nebi. ⁹ Aden chuisho chieshënquin bedshun icsambo icquid uidën uacbimboen shocosh nacnenaidën mëtaniac mëyadebi. ¿Ëbi aden uidën uacbimboenda Nuquin Papan chiaid

uidën uapadic? Padenquo. Ëmbi chuibenetiapimbo icnuc Nuquin Papan chiaid chuibanquido utsibon adem-bidi chuibenendac. ¹⁰ Adnubi: —Aden Nuquin Papan ambi tantiactedi Esuquidistu tantiamendac. Aid tanti-aquido unësacsho cuidenquo icquin abëdi tabadmendac —quec chieshtoenquo iccobi quënën nauedondaaid yequi. ¹¹ Naden abimbo chiaidquo tantiash chieshtoenquo ic-cobi.

—Abi bunaid ënshun Nuquin Icbon chiacpadomboen naquid chieshëmënnquidën unës uacsho Nuquin Icbon abi yacno abëdi tabadmendac.

¹² Utsibon chieshënaqui chieshtoenquo icquin Esus tantiec unësash abi yacno nidendac. Nidacsho chuiquid icmiac utsibo namendac.

“Esus tantiatiapimbo iquebi,” quequidobic: “Ëmbi tanti-acmaido neque. Nëid nuquibëdi tabadmenquien ictiad, Papa,” quequin Esusën Nuquin Papa chien-dac.

¹³ Aden abi tantiesabon ambi chiaid niac-niacsho isun Nuquin Icbo Esusën ambi chiacpadomboen naquidquo icquin icsaïdo cuidendac.

Adembidi ambi chiacpadomboen abi tantiaquido bë-dambo icmendac

—quequin chiaid tantiashun ambi chiacpadomboen naquin Esusën naid chuibanuna chieshtoenquo icquin.

Nuquin Papan chiaid isbanta, quiaid

¹⁴ Ëmbi dada uaquin chuiboed mibëd icquido naden chuibanta, mado. —Nuquin Icbon nuqui isnubi Esusquio chienquo yec ambembi chiaid chiec mibi chushcanan-queque. Adenda. Adec chushcanansho tantiash matses icsambo yaneque. Padi —cata, mado. ¹⁵ —Mibi bëdambo iquec —Nuquin Papa camenuen bëdamboen nata. —Dacuëdtiapimbo iquebique. Ëmbi naid ma Nuquin Papan

isnu —qeshun adota. Ambi chiaid bēdamboen isban-shun chieshtoenquo icquin Nuquin Papan chiaidquo chuibanta, mado. ¹⁶ Ambembi chiaid chuiquidobēd on-quec tabadenda. Adec onquequido icsambo icboedi buē-danquiec Nuquin Papan chiaid niac-niaquec icsamboshē yaneque. ¹⁷ Toshō bedacbimboec adquidēn chiaid tantiaquido dadpen yaneque. Adquidēn chuisho tantienda. Aden chuiquid Imeneyo caid nec. Adquidbidi Pideto caid nec. ¹⁸ Aidon Nuquin Papan chiaidquo chienquo icquin muaquin chiec. —Esus tantiaquido unēsabi icquido nēbimbobi uincuenacbimboec icpec. Unēsacsho aton dada chuca uaquin uincuemenuo iquendac —quequin muaquin chuisho tantiashun utsibon Nuquin Icbon chiaid tantienquo yanac. ¹⁹ Aidon Esus tantiabien icchitash. Nuquin Papan Esus tantiamiac ēnenquo icquin Esus tantiatsempanēdash. Padnuc Esus tantiaquidombo dadpen iquec. Adquido chuiquin ambi dada uamepampicpadomboen: “ ‘Ēbi tantiaquidombo nec,’ quequin Nuquin Icbon tantiec.” Adnuc Esus tantiaquidēn: —Con Icho Esus nec —qeshun ambi icsamboen naid ēnendac.

²⁰ Esus tantiaquido nadquo iquec. Shubu dapan tsitsan tabēcaid tabadacbimboecquid nec. Tsitsan abentsec icsactsēcquo icnubi utsi-utsiec bēdambo iquec. Icsactsēcquidēn icsa secanun sandoquid yendac. Bēdambo icquidēn di nandoquid yendac. Adecbidi Nuquin Papan shubun tabadtequido iquec. Utsi-utsiec Nuquin Papan chiaid natiadquo yec Esus tantiaquidquo icnubi utsi-utsiec abi icsaid ēnabi: —Esus tantianu —quetsēcquid iquec. ²¹ Esus tantiaquidquo ictiadquo yec: —Muaid chuisho tantiatipimbo icquin nēbi Nuquin Icbon chiacpadomboen natiadquo iquebi —quiash Nuquin Icbon yuambo yantsiash. Adsho Nuquin Icbon bēdamboen nametsiash.

²² Caniabon mëmunenquoio icquin abi bunacpadomboen naquid tanenda, mado. Adenquoio yec bëdamboec tabadte bunquiota. Nuquin Papan chiaid niacte bunenquoio yec: —Nuquin Icbo Esus nec —quequidobëdtan chieshtoenquoio icquin Esus tantiata. Matsestsen tantiec bëdamboec isnanec bëdamboec tabadta. ²³ Mibi yacnoshon ambembi chuiquidon: —Mimbi icsamboen tantiec —canuen: —¿Mitsipaden mimbi tantiape? —cac chienda. Adquidën chuisho tantiash matses chushcananondashe. Aidën chiac chienda. ²⁴ Nuquin Papan chiaid chuibanquid chushcananenquoio icquid nendac. Chieshëmënenquoio icquin aton matses bëdamboen isquid nendac. Adembidi nëishënenquoio icquin Nuquin Papan chiaid tantiamequid nendac. Utsibon chieshënaqui chieshënanenquoio icquid nendac. ²⁵ Esus tantiesabon: —Mimbi Nuquin Papan chiaid chuisho tantiatiapimbo iquebi —cac adembi nëishenquoio icquin Nuquin Papan chiaidquoio chuibanendac. —Nuquin Papan ambi chiaidquoio tantiamiac: “Icsamboen naombi,” quequin ma Esus tantiesan tantiabenu —quequin aden chuibanendac. ²⁶ —Aden Nuquin Papan ambi chiaidquoio tantiamiac Esus tantienquoio icboedëmbi Esus tantiabenshun abi yuaquidën Satanasën namiaid ënendac. Aden Nuquin Papan chiacpadomboen naindac —qeshun chieshtoenquoio icquin Nuquin Papan chiaidquoio chuibanendac abi chuibanquidën.

3

Tantsambo icquido iquendac, quiaid

¹ Tantia, mado. Mibi chuinu. Esus padpidec choabi icnuc matses dadpenquioshë icsamboshë iquendac. ² Nadquido iquendac. Nëidic utsi tantiatiapimbo yec abiuidtsëqui datantiadquido. Nëidic piucquid bedte

comapenec bunquidombo. Nēidic: —Is. Ęmbimbo naiduidi bēdambo iqueque —quequido. Nēidic utsibo chieshēnec icsamboec onquequido. Nēidic amēn chiaid niac-niacquido. Nēidic anin chiaid niac-niacquido. Nēidic aton na nashunaqui nashumēnenquio icquido. Nēidic Nuquin Papan chiaid niac-niacquidombo. ³ Nēidic aton matses tantiesabo. Nēidic chiesh bēdanesabo. Nēidic muauanquido. Nēidic abi icsate bunaid ēnenquio icquido. Nēidic cuesanquido. Nēidic bēdambo icquid chieshēnquido. ⁴ Nēidic bēdambo icquid damianquiashic cuesuni-anquido. Nēidic bēdamboen tantienquio yec badedi icsa uanquido. Nēidic: —Ębiuidtsēqui bēdambo iquec —quec abibi tantiadquido. Nēidic ambi naiduidi bunquin Nuquin Papa tantiesabo. ⁵ Nēidic: —Nuquin Papa tantiaquid nebi —quec muaquin aidēn chiaid niac-niacquido. Adquidtedi icsambo icquido nec. —Adquidbēduidi onquec tabadenda —caimbi.

⁶ Adquidon mibi yacnoshon shubu utsin shubu utsinquien isben-isbenac caosh. Adash chidoidquio icnubi shubun puduedshun ambembi chiaid chuibanac caosh. Aden chuisho tantiashun: —Padi —catiadquidi chidon: —Mimbi chiaid tantianu —quequin badedquio tantiac caosh. Nuquin Papan chiaid niacash adecbidi icsate bunquiec tabadac caosh aid chidobo. ⁷ Aden icsambo icquidēn ambembi chuidenesho tantianeshun Nuquin Papan chiaidquio tantiatiapimbo icpac caosh aid chidobo. ⁸⁻⁹ Aid chidobo chiec muaquido icsambo icpampidobimboec iquec. Icsambo icpampid abentsēc Canes cuēmēdnubi utsi Mambades cuēmēdpampic. Isadaidbo tsusedpa Moisesēn Nuquin Papan chiaidquio chuisho tantiashun aidon: —Mue nec. Ęmbimbo comapenen tantiaquin ismenu —queboedombi bēdiactsēc tantiaquin nacnenuidpampic. Adsho isun: —Abimbo cainquio iccosh. Mua-

chitosh —capampic matsesën. Adembidi chido chiec muaquidon icsate bunquin ambi chiaid chuitiapimbo icsho Nuquin Papan bēdamboen istiapimbo iquec. Adembidi aidon muaquin chuisho tantiashun matses dadpen-shun: —Muequi nec —capendac.

Nuquin Papan chiaid isbanec bēdamboec tabadte

¹⁰ Ēbien muaquidpenquo nec. Ēmbi naid ma mimbi tantieyoc. —Ma Esus tantianu —quequin Esusën naid chuibanec bēdamboec tabadondabi. Esus tantiaquidquo icquin matses tantiaquin Esusën naid chuibeniondambi. Chieshēnaqui chieshtoenquo icquin adembi chuibeniondambi. ¹¹ Ēmbi aden chuibansho isun chieshēnon-dashi. Shubu dadpen icquid Antioquiya caid yacnoshon ēbi: —Cuesnu —casha Nuquin Icbon nac padenquo icpondash. Adshumbic shubu dadpen icquid utsi Iconio caid yacnoshontsen adembidi. Adshobini shubu dadpen icquid utsi Disteda caid yacnoshonquo bedshun cuēnoten se-sequin unēs uatsempondash. Adsho Nuquin Icbon nac unēsenuo iccondabi. ¹² Ēbipadquido Esus tantiaquidotedi bēdamboec tabadtiaquido icsho adembidi utsibon comapenen chieshēnendac. ¹³ Padnuen chieshēmēnquidobēd bēdambo icquid damianquiec muaquido bēdiactsēc icsambo icboedi muauananquiec buēdanquiec icsamboshē yanendac.

¹⁴ Mibi adquidpenquo nec, mado. —Ēmbi isondaidon bēdambo icquidon abimbo chuibanondashi —quec Nuquin Papan chiaid niaquenquo yec bēdamboec tabadta, mado. ¹⁵ Ēnden bacuēmpi icquin Nuquin Papan chiaidquo min matsesën chuibansho mimbi tantianēdac. Adshun: —Aton Mado Esus tantiaquid unēsacsho abēdi Nuquin Papan tabadmendac —quequin mimbi tantiabenēdac. Aden Nuquin Papan bēdamboen iste tantiametembo Nuquin Papan chiaid nendac.

¹⁶ Nuquin Papan chiaid aton Mayanën tantiamiac matsesën dada uapampic. Aidën chiaid abitedimbo bēdambošhē iquec. Aid isec onquequin: —Nuquin Papan chiacpadec bēdamboec tabadnuna. Esus tantiaquido yec icsainquien ictiad —quequin abi chuibanquidēn chuibanec. Adembidi: —Esus tantiaquido adesa. Padi. Bēdamboembien natiad —quequin chuibanec. ¹⁷ Nuquin Papan: —Ĕmbi chiaidquio tantiashun Esus tantiaquinc matses nashunquinc caic Esus tantiaquido ma bēdamboec tabadnu —quequin ambi chiaidquio dada uamepampic.

4

Nuquin Papan chiaid chuisho tantienquio yaid

¹ Nuquin Papabēdtan Esuquidistun mibi iseque. Bēdamboen nata. Esusën nidaidēn padpidec choshon abitedishun Icbombo icquin unēsaido uincuemiaido unēsabi icquidobēdta chiendac. —Nēid ēbi tantiaquid ēbēdi tabadmembī. Nēid ēbi tantiesa cuidembī —quequin chiendac. ² Aidën chiacpadomboen naquin Nuquin Papan chiaidquio chuibanta, mado. Matsesën tantiatiadquio icnuc adota. Tantiatiapimbo icnubi adembī chuibanta. Esus tantiaquido icsasho isun: —Esus tantiaquido adesambo neque. Bēdamboembien natiad —quequin nēishēmēnenquio icquin chuita, mado. Utsibo bēdamboec tabadsho: —Mibi bēdamboec tabadoc. Aduidequi tabadta —quequin chieshtoenquio icquin chuita. Bēdiactsēc tantiatsēcquido: —Esus tantiaquidon nadoquid —quequin chuibanta, mado. ³ —Yuecshun Nuquin Papan chiaidquio matses dadpenshun tantiatiapimbo iquendac —queshun nata, mado. Aden tantiatiapimbo icquidēn Nuquin Papan chiaidpenquio chuisho tantiash: —Mimbī ēbi bunaidquio chuisho tantianu. Ĕbi chiec cho —quequin muaquid utsi-utsien abi yacno puduedmendac.

⁴ Pamumëdacbimboecquin Nuquin Papan chiaid tantienquo icquin tsusedpabon ambembi chiampiduidi tantien-dac. ⁵ Aidën nacpadomboen nainda, mado. Nuquin Papan chiaidquo bëdamboen tantiaquid yec bëdamboec tabadta. Adsho utsibon chieshënaqui chieshtoenquo icquin Esusquo tantiata, mado. Adembidi Nuquin Papan bëdamboen iste Esus tantiesabo chuibanta. —Esus chuibanquidën nadoquid —caidtedi nabanta, mado.

⁶ —Ëbi unës uan ëmbi nacpadomboen: “Adota,” mibi caquid nibëdtsiash —qeshun mibi aden chiec nebi. Nëbi Nuquin Papan tantiacpadën chieshëmënkuidon ëbi unës uaic. ⁷ Utsibon chieshënubi ënenquo icquin Esusën naid chuibeniombi. —Ëbi bunaid bednu —quec comapenec titinquiabimboen dayacquo icquin Nuquin Papan chiaidtedi naombi. Chieshtoenquo icquin Esus tantiaquidquo nebi. Adshobini nëbi unës uaic. ⁸ Unës uacshobini matsesën naid abitedimbo tantiaquidën Nuquin Icbon: —Ëbi tantiaquin ëmbi chiacpadomboenuidi naic mibi bëdambo iccoque. Nuquin Papa yacno ëbëdi tabadmequin mibi bëdamboshë icmendambi —caindac. Abi chote ushën choshon aden Nuquin Icbon ëbi chiendac. Adembidi abi chosho iste bunquidotedi abi tantiaquido Nuquin Icbon abëdi tabadmendac.

Timoteyo: Cho, caid

⁹ Nëbimbobi ëbi isec cho, mado. ¹⁰ Utsibo nidanebon ëbentsëqui tsadebique. Demas caid aton na bedteuidi bunec ëbi nianec shubu dadpen icquid Tesadonica caid yacno nidosh. Quedesente caidic nidaid utsi Cadasia caid yacno nidosh. Titobic nidaid utsi Damasia caid yacno nidosh. Aidtedi nidanebon ¹¹ Ducas abentsëqui ëbëdi iquec. Madcos bedbëtsenec cho, mado. Ëbëdtan aidëmbi nëshunquo Esus chuibantsiashe. ¹² Tiquico caid Epeso yacno mibi yacno nidmiombi. ¹³ Shubu dadpen icquid

Todoas caid yacno Cadpo cuëmëdquidën shubun con na niamëdaccondashe. Con dashcute ëmbi dada uaidbëdta bedbëtsenec cho, mado. —Abitedi buantiapimbo iquebi —qeshun nëish yua bitsi nacnenaid dada uaiduidtsëqui bëta.

¹⁴ Shocosh nacnenquidën Adecandedo caidën comapenen chieshë nondashi. Aid Nuquin Papan cuidendac, mado. ¹⁵ Nuquin Papan chiaid ëmbi chuisho tantiatiapimbo icquin icsamboen chuishunondashibique. Choquin aid isenda: —Ëbitsen icsamboen chuishunushe —qeshun. ¹⁶ Ënden tauamboen bedshun: —Quënën nauednu —cac cuidte chuiquid dapa ëmbentsëqui chuibampondambi. —¿Mitsipadosho isun ëbi bedo? Icsamboen nambo iccombi —capondambi. —Ëbëd icboedon dadpenshun: “Bëdambo icquid nec,” quequin ëmbi naid chuibanac ëbi quënën nauedquidon ëbi nidmetsiash —qeshun ëbëd icboedo: —Chiec cho —caqui choenquio iccondash. Aden ëbi cacuidondaido tantiaquin: —Nuquin Papan aido cuidenquio icpashun —caimbi. ¹⁷ Nuquin Icbombini nianenquio iccondash. —Isadaidpembo matses utsibo ma ëmbi naid chuibenenu —quequin cuesambo icmepondashi. Adondaid icshobini chieshëmënquidon: —Cuesnu —cabededpondash. Nuquin Icbon nac aid matsesën unës uainquio icpondashi. ¹⁸ Padpiden chieshëmënquidon ëbi caic: —Ma mëyanac chieshtoshon Esus tantienquio yanu —casha Nuquin Icbon nac chieshtoenquio ictsiabi. —Nuquin Icbombidi abi yacno ambi matses dadpen namiacno abëdi ëbi tabadmendac —qeshun: —“Nuquin Icbo bëdamboshë iquec,” canuna ënenquio icquin —caimbi.

¹⁹ Mibi yacnocquido: —Mibi caic: “Unësquio iquec,” quiosh Pabado —quequin chuiban, mado. Nëidic Aquida caid. Nëidic aton chido Pidisida caid. Nëidic Onesipodo

caid chedo. Aidtedi aden chuiban. ²⁰ Mimbi isondaid Edasto caid shubu dadpen icquid Codinto yacno tēshē-dondash ēbi chonoc. Utsibic Tēdopimo caid aton dada icsabudacsho shubu dadpen icquid Mideto caid yacno nianondambi. ²¹ Ue tsasi iquenuanquid taēnushe. Baded cho, mado. Doma yacnocquido nēmbo icquidon: — “Timoteyo unēsquo iquec,” quequin dada ua —caposhi. Nēidic Eyobudo caid. Nēidic Pudente caid. Nēidic Dino caid. Nēidic Quēdaudia caid. Nēidic Esus tantiaquido nēmbo icquido utsibotedi. Aidtedi adosh. ²² —Nuquin Icho Esusēn abēd icquin con mado bēdamboen ispashun —quequin mibi tantiembi. Padi. Aidtedi chuiquin dada uaombi, mado.

Esuquidistu Chuiquin Tantiamete
New Testament in Matsés (PE:mcf:Matsés)

copyright © 2008 Wycliffe Bible Translators, Inc.

Language: Matsés

Translation by: Wycliffe Bible Translators, Inc.

Matsés [mcf], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Matsés

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

